

Formado den proceso pa fiha programa di gobernacion



ORANJESTAD – Formado Mike Eman ta teniendo su reunionnan. Ya tin un par di dia caba cu el a sinta na mesa cu instancianan cu ta trahando riba proyectonan grandi. Segun formado Mike Eman, awor aki ta den proceso pa bay fiha e programa di gobernacion cu e siguiente gobierno mester tin y den e contexto ey ta hopi importante pa haci un inventarisacion di e proyectonan cu ta bay tin un impacto riba e desaroyo social economico di Aruba.

MAS REUNION

Eman a sigui menciona cu tambe lo bay reuni riba e parti di e contenido di e programa pa local ta trata temanan manera enseñanza, temanan manera financia publico, husticia, desaroyo social den nos comunidad. Durante di e siman aki lo bay tin un cantidad di reunion cu fundacionnan y departamento y ministerionan cu ta encarga specificamente cu e areanan ey cu tambe ta hopi importante pa e siguiente cuater añanan.

TRABAO DI FORMADO
E trabao importante cu e for-

mado tin cu haci ta consisti di dos fase. Uno ta e contenido di kico e siguiente gobernacion mester bay duna atencion primordial na dje y formalisa esaki tambe den un concepto despues di un programa di gobernacion y tin e di dos fase, cu hopi biaha interes ta mas grandi den e discusionnan publico kendenan ta bira minister, cua ministerionan ta bay tin y esey ta bay ta e di dos fase di e trabao di formado. E formado ta purba pa ta cla entrante 1 di November, cu ta e momento cu tin un parlamento nobo cu realmente lo por nombra ministernan nobo tambe.

PARLAMENTO LO APUNTA MINISTERNAN NOBO

Eman a comenta cu si tabata tin nombrenan pa e ministernan nobo, nan no lo por wordo apunta ainda, pasobra ta e parlamento nobo lo bay apunta nan. Esey ta duna espacio na e formado pa por traha un rato riba e contenido cu ta hopi importante y e ora ey pa por dedica tambe tempo na yega na tuma un inventarisa-

cion di e ministerionan. Nan responsabilidad, reparticion di e carteranan con nan por wordo miho atendi pa futuro y naturalmente e parti di kendenan ta bay carga e responsabilidad aki cu finalmente ta un decision cu ta wordo tuma door di parlamento di Aruba, el a bisa. Formado lo haci proposicion pero finalmente ta parlamento di Aruba ta dicidi si e personanan aki lo bay tuma encargo.

PROYECTONAN CU TA CANA PARALELO

Eman a sigui bisa cu durante e reunionnan a papia riba mudamento di waf. Ayera a papia riba Green Corridor y e Ringweg. E dos proyectonan aki ta hopi acopla na e mudamento di waf presenta dor di APA. Na mei 2015, e waf di container ta lo keda cla na Barcadera. Si no tin e conexon di infraestructura entre e waf di Barcadera y e areanan caminda cu hopi di e carga aki tin cu yega cu hopi biaha ta mas pabao di e isla, e ora ey tin un reto hopi grandi den trafico, Eman a splica. Ta esencial pa e proyectonan aki cana hopi paralel na e momento aki. Ta pa e motibo ey formado a papia cu esnan cu ta desaroyando e proyecto di Green Corridor y Ringweg pa por tin un idea tambe tanto di e impacto economico, impacto di infraestructura y tambe pa garantisa e sincronisacion cu a wordo enfatisa dor di APA, cu pa ora cu waf di container keda cla, en todo caso e conexon entre Barcadera y e Green Corridor te na altura di Drive Inn, mester ta cla y lo ta hopi bon tambe si e ora ey e Ringweg cu ta evita tur e container trucknan aki mester pasa den centro di ciudad, lo por pasa rond di centro di

ciudad, si e Ringweg por ta cla. Den e sentido ey tanto e impacto social economico ta importante pa e formado ta informa di dje, pa por dun'e su luga tambe den e programa cu ta bay tin pa e siguiente añanan. Tambe pa cuminsa prepara gobierno riba e reto nan di timing y sincronisacion cu tin pa e proyecto aki por cana den un forma hopi paralelo.

TRABAONAN TIN CU SIGUI

Segun Eman, e espacio actual den gobierno ta pa e ministernan cu ta sinta, por keda demisionario encarga cu e trabao di gobierno. Tin paisnan y na Aruba tambe sa sosode, cu formacion por tuma hasta te cu seis luna. Esaki hopi biaha ta sosode durante temponan di coalicion, caminda ta haya cu e personanan ta keda temporalmente riba e puesto. Eman ta mira si e oportunidad pa instalacion di e gobierno nobo tempran den luna di November. Si por, corto despues cu tin parlamento nobo, cu por yega na apunta tambe e consejo di minister nobo pa e trabaoan por sigui sin ningun interrupcion. Manera por a mira e proyectonan cu tin actualmente, ta grandi. Nan tin un impacto importante riba e desaroyo economico di pais Aruba, pero nan ta exige tambe un sincronisacion y un tarea importante di sostene tanto APA como ASTEC den e caso aki pa e cosnan cu di parti di gobierno mester tuma luga, manera otorgamento di tereno, reglamento di infraestructura, tur tuma luga den un forma sincronisa, pa e proyectonan aki tin nan impacto maximalmente positivo pa nos pais, Eman a conclui. □